




宮闈典第五十卷

妃嬪部列傳四

金 太祖蕭崇妃

按金史后妃傳崇妃蕭氏熙宗時封貴妃天德二年正月封元妃是月尊封太妃海陵母大氏事蕭氏甚謹海陵篡立尊大氏爲皇太后居永寧宮每有宴集太妃坐上坐大氏執婦禮海陵積不能平及殺宗義等誣太妃以隱惡殺之併殺所生子任王隈喝大定十九年詔改葬太宗正丞宗安監護葬事遣使致祭上欲復太妃舊號下禮官議前代稱太妃者皆以子貴古者入稱后繫夫在朝稱太繫子與今蕭妃事不同恐不得稱太止當追封妃號詔從之乃封崇妃云

海陵三妃

按金史后妃傳海陵爲人善飾詐初爲宰相妾媵不過三數人及踐大位逞欲無厭後宮諸妃十二位又有昭儀至充媛九位婕妤美人才人三位殿直最下其他不可舉數初卽位封岐國妃徒單氏爲惠妃後爲皇后第二娘子大氏封貴妃第三娘子蕭氏封昭容耶律氏封修容其後貴妃大氏進

封惠妃貞元元年進封妹妃正隆二年進封元妃昭容蕭氏天德二年特封淑妃貞元二年進封宸妃修容耶律氏天德四年進昭媛貞元元年進昭儀三年進封麗妃卽位之初後宮止此三人尊卑之叙等威之辨若有可觀者及其侈心旣萌淫肆蠱惑不可復振矣

### 海陵蒲察昭妃

按金史后妃傳昭妃阿里虎姓蒲察氏駙馬都尉沒里野女初嫁宗盤子阿虎迭阿虎迭誅再嫁宗室南家南家死是時南家父突葛速爲元帥都監在南京海陵亦從梁王宗弼在南京欲取阿里虎突葛速不從遂止及篡位方三日詔遣阿里虎歸父母家閱兩月以婚禮納之數月特封賢妃再封昭妃阿里虎嗜酒海陵責讓之不聽由是寵衰昭妃初嫁阿虎迭生女重節海陵與重節亂阿里虎怒重節批其頰頗有詆訾之言海陵聞之愈不悅阿里虎以衣服遺前夫之子海陵將殺之徒單后率諸妃嬪求哀乃得免凡諸妃位皆以待女服男子衣冠號假厮兒有勝哥者阿里虎與之同臥起如夫婦廚婢三娘以告海陵海陵不以爲過惟戒阿里虎勿管箠三娘阿里虎榜殺之海陵聞昭妃閤有死者意度是三娘曰若果爾吾必殺阿里虎問之果然是月光英生月海陵私忌不行戮阿里

虎聞海陵將殺之也卽不食日焚香禱祝冀脫死逾月阿里虎已委頓不知所爲海陵使人縊殺之併殺侍婢擊三娘者

### 海陵唐括貴妃

按金史后妃傳貴妃定哥姓唐括氏有容色崇義節度使烏帶之妻海陵舊嘗有私侍婢貴哥與知之烏帶在鎮每遇元會生辰使家奴葛魯葛溫詣闕上壽定哥亦使貴哥候問海陵及兩宮太后起居海陵因貴哥傳語定哥曰自古天子亦有兩后者能殺汝夫以從我乎貴哥歸具以海陵言告定哥定哥曰少時醜惡事已可恥今兒女已成立豈可爲此海陵聞之使謂定哥汝不忍殺汝夫我將族滅汝家定哥大恐乃以子烏答補爲辭曰彼常侍其父不得便海陵卽召烏答補爲符寶祇候定哥曰事不可止矣因烏帶醉酒令葛溫葛魯縊殺烏帶天德四年七月也海陵聞烏帶死詐爲哀傷已葬烏帶卽納定哥宮中爲娘子貞元元年封爲貴妃大愛幸許以爲后每同輦遊瑤池諸妃步從之海陵嬖寵愈多定哥希得見一日獨居樓上海陵與他妃同輦從樓下過定哥望見號呼求去詛罵海陵海陵陽爲不聞而去定哥自其夫時與家奴閭乞兒通嘗以衣服遺乞兒及爲貴妃乞兒以

妃家舊人給事本位定哥既怨海陵疎已欲復與乞兒通有比丘尼三人出入宮中定哥使比丘尼向乞兒索所遺衣服以調之乞兒識其意笑曰妃今日富貴忘我耶定哥欲以計納乞兒宮中恐闢者索之乃令侍兒以大篋盛褻衣其中遣人載之入宮闢者索之見篋中皆褻衣固已悔懼定哥使人詰責闢者曰我天子妃親體之衣爾固翫視何也我且奏之闢者惶恐曰死罪請後不敢定哥乃使人以篋盛乞兒載入宮中闢者果不敢復索乞兒入宮十餘日使衣婦人衣雜諸宮婢抵暮遣出貴哥以告海陵定哥縊死乞兒及比丘尼三人皆伏誅封貴哥莘國夫人初海陵既使定哥殺其夫烏帶使小底藥師奴傳旨定哥告以納之之意藥師奴知定哥與闢乞兒有姦定哥以奴婢十八口賂藥師奴使無言與乞兒私事定哥敗杖藥師奴百五十先是藥師奴嘗盜玉帶當死海陵釋其罪逐去及遷中都復召爲小底及藥師奴既以匿定哥姦事被杖後與祕書監文俱與靈壽縣主有姦文杖二百除名藥師奴當斬海陵欲杖之謂近臣曰藥師奴於朕有功再杖之卽死矣丞相李膺等執奏藥師奴於法不可恕遂伏誅海陵以葛溫葛魯爲護衛葛溫累官常安縣令葛魯累官襄城縣令大定初皆除名

海陵唐括麗妃

按金史后妃傳麗妃石哥者定哥之妹祕書監文之妻也海陵私之欲納宮中乃使文庶母按都瓜主文家海陵謂按都瓜曰必出而婦不然我將別有所行按都瓜以語文文難之按都瓜曰上謂別有所行是欲殺汝也豈以一妻殺其身乎文不得已與石哥相持慟哭而訣是時海陵遷都至中京遣石哥至中都俱納之海陵召文至便殿使石哥穢談戲文以爲笑定哥死遣石哥出宮不數日復召之入封爲修容貞元三年更進昭儀正隆元年進封柔妃二年又進麗妃

海陵耶律柔妃

按金史后妃傳柔妃彌勒姓耶律氏天德二年使禮部侍郎蕭拱取之於汴過燕京拱父仲恭爲燕京留守見彌勒身形非若處女者歎曰上必以疑殺拱矣及入宮果非處女明日遣出宮海陵心疑蕭拱竟致之死彌勒出宮數月復召入封爲充媛封其母張氏莘國夫人伯母蘭陵郡君蕭氏爲鞏國夫人蕭拱妻擇特懶彌勒女兄也海陵旣奪文妻石哥却以擇特懶妻文旣而詭以彌勒之召召擇特懶入宮亂之其後彌勒進封柔妃云



海陵昭妃阿懶

按金史后妃傳昭妃阿懶海陵叔曹國王宗敏妻也海陵殺宗敏而納阿懶宮中貞元元年封爲昭妃大臣奏宗敏屬近尊行不可乃令出宮

海陵高修儀

按金史后妃傳修儀高氏秉德弟乂里妻也海陵殺諸宗室釋其婦女宗本子莎魯刺妻宗固子胡里刺妻胡失來妻及乂里妻皆欲納之宮中諷宰相奏請行之使徒單貞諷蕭裕曰朕嗣續未廣此黨人婦女有朕中外親納之宮中何如裕曰近殺宗室中外異議紛紜奈何復爲此邪海陵曰我固知裕不肯從乃使貞自以己意諷裕必欲裕等請其事貞謂裕曰上意已有所屬公固止之將成疾矣裕曰必不肯已唯上擇焉貞曰必欲公等白之裕不得已乃具奏遂納之未幾封高氏爲修儀加其父高耶魯瓦輔國上將軍母完顏氏封密國夫人高氏以家事訴於海陵海陵自熙宗時見悼后干政心惡之故自卽位不使母后得預政事於是遣高氏還父母家詔尙書省凡后妃有請於宰相者收其使以聞

# 海陵耶律昭媛

按金史后妃傳昭媛察八姓耶律氏嘗許嫁奚人蕭堂古帶海陵納之封爲昭媛堂古帶爲護衛察八使侍女習撚以軟金鵲袋數枚遺之事覺是時堂古帶謁告在河間驛召問之堂古帶以實對海陵釋其罪海陵登寶昌門樓以察八徇諸后妃手刃擊之墮門下死并誅侍女習撚

## 世宗張元妃

按金史后妃傳元妃張氏父元微母高氏與世宗母貞懿皇后葭莩親世宗納爲次室生趙王永中而張氏卒大定二年追封宸妃是歲十月追進惠妃十九年追進元妃大定二十五年皇太子薨永中於諸子最長而世宗與徒單克寧議立章宗爲太孫世宗嘗曰克寧與永中有親而建議立太孫眞社稷臣也尙書左丞汝弼者元微子永中母舅汝弼妻高陀斡屢以邪言怵永中畫元妃像朝夕事之覬望徼福及挾左道明昌二年高陀斡誅死事連汝弼及永中汝弼以死後事覺得不追削官爵而章宗心疑永中累年不釋諫官賈守謙路鐸上疏欲寬解上意章宗愈不悅平章政事完顏守貞持其事不肯決章宗怒守貞罷知濟南府諸諫官皆斥外賜永中死金代外戚之禍惟張氏云



世宗李元妃

按金史后妃傳元妃李氏南陽郡王李石女生鄭王允蹈衛紹王允濟潞王允德豫王允成母昭儀梁氏早卒上命允成爲妃養子大定元年封賢妃二年進封貴妃七年進封元妃世宗卽位感念昭德皇后不復立后嘗曰朕所以不復立后者今後宮無皇后之賢故也元妃下皇后一等在諸妃上石有定策功世宗厚賞而深制之寵以尙書令之位而責成左右丞相以下妃雖貴不得預政宮壺無事大定二十一年二月上如春水次長春宮戊子妃以疾薨詔允成允蹈允濟允德皆服衰絰居喪己丑皇太子及扈從臣僚奉慰於芳明殿辛卯留守官平章政事唐括安禮曹王允功等上表奉慰御史中丞張九思提控殯事少府監左光慶大興少尹王脩典領鹵簿儀仗宮籍監別治殯所還殯京師乙未入自崇智門百官郊迎親戚迎奠道路殯于興德宮西位別室庚子上至京師幸興德宮致奠比葬三致奠焉詔平章政事烏古論元忠監護葬事癸未啟鼓上輟朝皇太子親王宗戚百官送葬甲申葬于海王莊丙戌上如海王莊燒飯二十八年九月與賢妃石抹氏德妃徒單氏柔妃大氏俱陪葬于坤厚陵衛紹王卽位追諡光獻皇后贈妃弟獻可特進貞祐三年九月削皇后號

章宗李元妃

按金史后妃傳元妃李氏師兒其家有罪沒入宮籍監父湘母王盼兒皆微賤大定末以監戶女子入宮是時宮教張建教宮中師兒與諸宮女皆從之學故事宮教以青紗隔障蔽內外宮教居障外諸宮女居障內不得面見有不識字及問義皆自障內映紗指字請問宮教自障外口說教之諸女子中惟師兒易爲領解建不知其誰但識其音聲清亮章宗嘗問建宮教中女子誰可教者建對曰就中聲音清亮者最可教章宗以建言求得之宦者梁道譽師兒才美勸章宗納之章宗好文辭妃性慧黠能作字知文義尤善伺候顏色迎合旨意遂大愛幸明昌四年封爲昭容明年進封淑妃父湘追贈金紫光祿大夫上柱國隴西郡公祖父曾祖父皆追贈兄喜兒舊嘗爲盜與弟鐵哥皆擢顯近勢傾朝廷風采動四方射利競進之徒爭趨走其門南京李炳中山李著與通譜系超取顯美胥持國附依以致宰相怙財固位上下紛然知其姦靈不敢擊之雖擊之莫能去也紇石烈執中貪悞不法章宗知其跋扈而屢斥屢起終亂天下自欽懷皇后沒世中宮虛位久章宗意屬李氏而國朝故事皆徒單唐括蒲察拏懶僕散紇石烈烏林答烏古論諸部部長之家世爲嬖婚娶后尙主而李

氏微甚至是章宗果欲立之大臣固執不從臺諫以爲言帝不得已進封爲元妃而勢位熏赫與皇后侔矣一日章宗宴宮中優人瑋瑁頭者戲於前或問上國有何符瑞優曰汝不聞鳳皇見乎其人曰知之而未聞其詳優曰其飛有四所應亦異若嚮上飛則風雨順時嚮下飛則五穀豐登嚮外飛則四國來朝嚮裏飛則加官進祿上笑而罷欽懷后及妃姬嘗有子或二三歲或數月輒夭承安五年帝以繼嗣未立禱祀太廟山陵少府監張汝猷因轉對奏皇嗣未立乞聖主親行祀事之後遣近臣詣諸岳觀廟祈禱詔司空襄往亳州禱太清宮旣而止之遣刑部員外郎完顏匡往焉泰和二年八月丁酉元妃生皇子忒隣羣臣上表稱賀宴五品以上於神龍殿六品以下宴於東廡下詔平章政事徒單鑑報謝太廟右丞完顏匡報謝山陵使使亳州報謝太清宮旣彌月詔賜名封爲葛王葛王世宗初封大定後不以封臣下由是三等國號無葛尙書省奏請于瀛王下附葛國號上從之十二月癸酉忒鄰生滿三月勅放僧度牒三千道設醮於元真觀爲忒鄰祈福丁丑御慶和殿浴皇子詔百官用元旦禮儀進酒稱賀五品以上進禮物生凡二歲而薨兄喜兒累官宣徽使安國軍節度使弟鐵哥累官近侍局使少府監至大定八年承御賈氏及范氏皆有娠未及乳月章宗已得嗽

疾頗困是時衛王永濟自武定軍來朝章宗於父兄中最愛衛王欲使繼體立之語在衛紹王紀衛王朝辭是日章宗力疾與之擊毬謂衛王曰叔王不欲作主人遽欲去耶元妃在傍謂帝曰此非輕言者十一月乙卯章宗大漸衛王未發元妃與黃門李新喜議立衛王使內侍潘守恆召之守恆頗知書識大體謂元妃曰此大事當與大臣議乃使守恆召平章政事完顏匡匡顯宗侍讀最爲舊臣有征伐功故獨召之匡至遂與定策立衛王丙辰章宗崩遺詔皇叔衛王卽皇帝位詔曰朕之內人見有娠者兩位如其中有男當立爲儲貳如皆是男子擇可立者立之衛紹王卽位大安元年二月詔曰章宗皇帝以天下重器昇於渺躬遺旨謂掖庭內人有娠者兩位如得男則立爲儲貳申諭多方皎如天日朕雖涼菲實受付託思克副於遺意每曲爲之盡心擇靜舍以俾居遣懿親而守視欽懷皇后母鄭國公主及乳母蕭國夫人晝夜不離昨聞有爽於安養已用軫憂而弗寧爰命大臣專爲調護今者平章政事僕散端左丞孫卽康奏言承御賈氏當以十一月免乳今則已出三月來事未可度知范氏產期合在正月而太醫副使儀師顏言自年前十一月診得范氏胎氣有損調治迄今脈息雖和胎形已失及范氏自願於神御前削髮爲尼重念先皇帝重屬大事豈期聞此深用怛

然今范氏既有損而賈氏猶或可冀告於先帝願降靈禧默賜保全早生聖嗣尙恐衆庶未究端由要不匿于播敷使咸明於吾意四月詔曰近者有訴元妃李氏潛計負恩自泰和七年正月章宗暫嘗違豫李氏與新喜竊議爲儲嗣未立欲令宮人詐作有身計取他兒詐充皇嗣遂於年前閏月十日因賈承御病嘔吐腹中若有積塊李氏與其母王盼兒及李新喜謀令賈氏詐稱有身俟將臨月于李家取兒以八月日不偶則規則取以爲皇嗣章宗崩謀不及行當先帝彌留之際命平章政事完顏匡都提點中外事務明有勅旨我有兩宮人有娠更令召平章左右並聞斯語李氏并新喜乃敢不依勅旨欲喚喜兒鐵哥事既不克竊呼提點近侍局烏古論慶壽與計因品藻諸王議復不定知近侍局副使徒單張僧遣人召平章已到宣華門外始發勘同平章入內一遵遺旨以定大事方先帝疾危數召李氏李氏不到及索衣服李氏承召亦不卽來猶與其母私議先皇平昔或有幸御李氏嫉妒令女巫李定奴作紙木人鴛鴦符以事魘魅致絕聖嗣所爲不軌莫可殫陳事既發露遣大臣按問俱已款服命宰臣往審亦如之有司議法當極刑以其久侍先帝欲免其死王公百僚執奏堅確令賜李氏自盡王盼兒李新喜各正典刑李氏兄安國軍節度使喜兒弟少府監鐵哥如

律仍追除復係監籍於遠地安置諸連坐並依律令施行承御賈氏亦賜自盡蓋章宗崩三日而稱范氏胎氣有損章宗疾彌留亦無完顏匡都提點中外事務勅旨或謂完顏匡欲專定策功構致如此自後天下不復稱元妃但呼曰李師兒及胡沙虎弑衛王立宣宗請貶降衛王降爲東海郡侯其詔曰大安之初頒諭天下謂李氏與其母王盼兒及李新喜同謀令賈氏虛稱有身各正罪法朕惟章宗皇帝聖德聰明豈容有此欺給近因集議武衛軍副使兼提點近侍局完顏達霍王傳大政德皆言賈氏事內有寃此時達職在近侍政德護賈氏所以知之朕親臨問左證其事曖昧據當時被罪貶責者可俱令放免還家由是李氏家族皆得還

元 泰定帝二妃

按元史后妃傳妃二人一曰必罕一曰速哥答里皆弘吉剌氏袁王買住罕之女也文宗天曆初俱安置東安州

明 太祖孫貴妃

按明外史后妃傳成穆貴妃孫氏陳州人元末兵亂妃父母俱亡從仲兄蕃避兵揚州青軍陷城元



帥馬世熊得之育爲義女年十八太祖納焉及卽位冊封貴妃位衆妃上洪武七年九月薨年三十有二賜諡帝以妃無子命周王橚行慈母服三年東宮諸王皆期勅儒臣作孝慈錄庶子爲生母服三年衆子爲庶母期自妃始葬褚岡賜兄瑛田租三百石歲供祀後祔葬孝陵 按椒宮舊事成穆貴妃姓孫氏參政孫英之妹嘗與上登香雲閣觀後苑刈稻上命宮人取酒來爲賞豐飲令妃誦詩侑酒妃爲歌李紳閔農詩上大悅賜予有加

### 太祖李淑妃

按明外史后妃傳皇淑妃李氏壽州人父傑洪武初以廣武衛指揮北征卒于陣十七年九月孝慈皇后服除冊封皇淑妃攝六宮事不立后而使妃攝自李氏始末幾薨

### 太祖郭寧妃

按明外史后妃傳皇寧妃郭氏濠人郭山甫女山甫善相人太祖微時過其家山甫相之大驚曰公相貴不可言因謂諸子子興英曰吾相汝曹皆可封侯者以此亟遣從渡江並遣妃侍太祖後封皇寧妃生魯王檀李淑妃薨妃攝六宮事山甫累贈營國公子興英皆以功封侯自有傳 按椒宮

舊事皇妃郭氏山甫之女也高皇微時過臨淮山甫見之驚異急具饌與交歡酒酣跪上備陳天表之異他日貴不可言幸無相忘上去山甫語諸子吾視若曹皆非田舍郎往往可封侯今始知皆以此公宜謹事之復以女入侍從渡江協孝慈以肇家孝慈崩嘗攝六宮事號皇妃追封山甫營國公成祖權賢妃

按明外史后妃傳恭獻賢妃權氏朝鮮人永樂七年冊爲賢妃時朝鮮貢女充掖庭妃與焉姿質穠粹善吹玉簫帝愛憐之命其父永均爲光祿卿八年十月侍帝北征凱還薨于臨城賜諡藁葬嶧縣成祖王貴妃

按明外史后妃傳昭獻貴妃王氏蘇州人永樂七年冊爲貴妃妃有賢德事仁孝皇后恭謹爲帝所重帝晚年多急怒妃曲爲護調自皇太子親王公主以下皆倚賴焉十八年七月薨禮視太祖成穆孫妃

### 仁宗譚順妃

按長沙府志譚妃湘潭先澤鄉人父福永樂十六年由知縣擢浙江道御史二十一年女選爲洪熙

古今圖書集成  
帝妃元年帝崩妃自縊宣宗勅封昭容恭禧順妃

宣宗吳賢妃

按明外史后妃傳賢妃吳氏景皇帝母也丹徒人父彥名見外戚傳宣德中冊爲賢妃景帝卽位尊爲皇太后英宗復辟復稱宣廟皇賢妃成化中薨

宣宗郭嬪

按明外史后妃傳郭嬪諱愛字善理鳳陽人賢而有文入宮二旬而卒自知死期書楚聲以自哀詞曰修短有數兮不足較也生而如夢兮死則覺也先吾親而歸兮慚予之失孝也心悽悽而不能已兮是則可悼也

宣宗何貴妃

趙賢妃

吳惠妃

焦淑妃

曹敬妃

徐順妃

袁麗妃

諸淑妃

李充

妃 何成妃

按明外史后妃傳正統元年八月追贈皇庶母惠妃何氏爲貴妃諡端靜趙氏爲賢妃諡純靜吳氏爲惠妃諡貞順焦氏爲淑妃諡莊靜曹氏爲敬妃諡莊順徐氏爲順妃諡貞惠袁氏爲麗妃諡恭定